

### 3 Scéal Nuachta

**Ceist 1** Beidh tú ag féachaint ar ball ar thrí scéal ghearra nuachta. Sula bhféachann tú ar an tuairisc áfach, an féidir leat na focail a cheangal le chéile?

1. was sentenced ...	a. cloigeann
2. false documents	b. ceannródaithe
3. feud / dispute	c. gearradh...ar
4. forged	d. gaschealla
5. fraudulently	e. scrúdú iarbháis
6. head	f. cáipéisí bréagacha
7. injury	g. gortú
8. pioneers	h. dallamullóg a chur ar
9. post-mortem exam	i. achrann
10. stem cells	j. go calaoiseach
11. to hoodwink	k. brionnaithe

1	2	3	4	5	6	7	8	9	10	11

**Ceist 2** Tabhair buille faoi thuairim cé acu de na ceanteidil thíos a mbaineann na focail ó cheist 1 leo. Ná féach ar an tuairisc go fóill!

<b>Scéal 1 – Bás fir</b>
<b>Scéal 2 – Iardhlíodóir calaoiseach</b>
<b>Scéal 3 – Ollscoil na hÉireann, Gaillimh</b>

Cad a bhí ag an duine in aice leat?  
Anois féach ar an tuairisc le fáil amach an raibh an ceart agat.

**Ceist 3** Féach ar an tuairisc arís. An bhfuil na habairtí seo fíor nó bréagach?

**Scéal 1 – Bás fir**

- Maraíodh an fear de bharr troda.
- Bhí an fear sé bliana is tríocha d'aois.

**Scéal 2 – Iardhlíodóir calaoiseach**

- Gearradh tréimhse príosúin trí bliana ar an iardhlíodóir as airgead a fháil ar iasacht go calaoiseach.
- Bhí na hinstitiúidí airgeadais ag iarraidh teacht i dtír uirthi.
- Tá muinín ag daoine aisti mar dhlíodóir i gcónaí.

**Scéal 3 – Ollscoil na hÉireann, Gaillimh**

- Ní hé seo an chéad áis in Éirinn chun gaschealla a shaothrú.
- Dul chun cinn mór é seo i dtaighde an leighis.

**Ceist 4** An aidiacht shealbhach

**A.** Líon na bearnaí:

mo chóta	m'aiste
do _____	d' _____
a _____ (fear)	a _____ (fear)
a _____ (bean)	a _____ (bean)
ár _____	ár _____
bhur _____	bhur _____
a _____	a _____

**B.** Féach ar an mír arís agus breac síos aon sampla den aidiacht shealbhach a chloiseann tú.

**Ceist 5** ‘...corp an fhir...’

Cén ghné den ghramadach atá i gceist leis na focail atá i gcló dubh thuas?

Féach ar na samplaí eile seo:

*uafás an bháis*  
*le linn an achrainn*  
*cinneadh an bhreithimh*

Déan na cinn seo anois.

míonna (an Geimhreadh):	_____
doirse (an gluaisteán):	_____
méid (an bord):	_____
dath (an páipéar):	_____
cumhacht (an creideamh):	_____
teocht (an cupán):	_____
leithead (an bóthar):	_____
áilleacht (an pictiúr):	_____

**Ceist 6** Pléigh na ceisteanna seo le do ghrúpa:

1. An bhfuil an ráta coireachta ag dul i méid in Éirinn, dar leat? Cén fáth?
2. An gceapann tú go mbíonn obair ionraic ar siúl sna hinstiúidí airgeadais i gcónaí?
3. Cad atá ar eolas agat faoi thaighde gaschealla?

Treoracha agus Freagraí

Ceist 1

1	2	3	4	5	6	7	8	9	10	11
c	f	i	k	j	a	g	b	e	d	h

Ceist 2

<b>Scéal 1 – Bás fir</b> Scrúdú iarbháis	gortú	cloigeann	achrann
<b>Scéal 2 – Iardhlíodóir calaoiseach</b> gearradh ... ar go calaoiseach	cáipéisí bréagacha dallamullóg a chur ar	brionnaithe	
<b>Scéal 3 – Ollscoil na hÉireann, Gaillimh</b> Gaschealla	ceannródaithe		

Ceist 3

Maraíodh an fear de bharr troda. **Bréagach**

Bhí an fear sé bliana is tríocha d'aois. **Fíor**

Gearradh tréimhse príosúin trí bliana ar an iardhlíodóir as airgead a fháil ar iasacht go calaoiseach. **Fíor**

Bhí na hinstiúidí airgeadais ag iarraidh teacht i dtír uirthi. **Bréagach**

Tá muinín ag daoine aisti mar dhlíodóir i gcónaí. **Bréagach**

Ní hé seo an chéad áis in Éirinn chun gaschealla a shaothrú. **Bréagach**

Dul chun cinn mór é seo i dtaighde an leighis. **Fíor**

Ceist 4

A.

mo chóta	m'aiste
do chóta	d'aiste
a chóta (fear)	a aiste (fear)
a cóta (bean)	a haiste (bean)
ár gcótaí	ár n-aistí
bhur gcótaí	bhur n-aistí
a gcótaí	a n-aistí

B. 'ag leanúint lena bhfiosruithe' / 'ina gceannródaithe'

Ceist 5

An tuiséal ginideach (firinsneach)

míonna (an Geimhreadh):	<i>míonna an Gheimhridh</i>
doirse (an gluasteán):	<i>doirse an ghluasteáin</i>
méid (an bord):	<i>méid an bhoird</i>
dath (an páipéar):	<i>dath an pháipéir</i>
cumhacht (an creideamh):	<i>cumhacht an chreidimh</i>
teocht (an cupán):	<i>teocht an chupáin</i>
leithead (an bóthar):	<i>leithead an bhóthair</i>
áilleacht (an pictiúr):	<i>áilleacht an phictiúir</i>

Ceist 6

Is féidir na foghlaimoirí a chur ag plé na gceistanna seo i mbeirteanna nó i ngrúpaí de thriúr nó de cheathrar.

**Máire T. Ní Mhadaoin**

**Scéal 1**

Tá Gardaí ag leanúint lena bhfiosruithe ar maidin maidir le bás fir sa Longfort. Léirigh scrúdú iarbháis gur bhásaigh an fear de bharr gortú a fuair sé sa gcloigeann nuair a thit sé. Deir na Gardaí go bhfuil siad fós ag iarraidh a fháil amach ar gortaíodh é le linn achrainn a tharla ar an mbaile níos luaithe sa lá. Fritheadh<sup>1</sup> corp an fhir, a bhí sé bliana déag is fiche, in árasán ar an mbaile maidin inné. Creidtear gurb as an bPolainn ó dhúchas dó.

**Scéal 2**

Gearradh tréimhse príosúin trí bliana ar iardhlíodóir mar go bhfuair sí naoi gcéad míle euro ar iasacht, trí leas a bhaint as cáipéisí bréagacha agus brionnaithe. D'admhaigh Mary Miley, caoga sé bliain d'aois, as Bré (Chualann), i gContae Chill Mhantáin, go bhfuair sí ceithre iasacht go calaoiseach idir 2005 agus 2007. Dúirt an breitheamh, Leonie Reynolds, go raibh tréimhse fhada caite ag Mary Miley ag iarraidh dallamullóg a chur ar institiúidí airgeadais. Dúirt sí go raibh an mhuinín a bheadh ag daoine aisti mar dhlíodóir sáraithe ar an mbealach is measa aici.

**Scéal 3**

In Ollscoil na hÉireann, Gaillimh inniu, osclaíodh an chéad áis in Éirinn a thairgfídh gaschealla a ghabhfaidh chun leasa an duine. Deirtear gur dul chun cinn mór é seo i gcúrsaí leighis agus tá súil ag an ollscoil go mbeidh siad ina gceannródaithe san earnáil seo.

---

<sup>1</sup> *Fuarthas* atá sa chaighdeán oifigiúil